

■ OPINIUNS

Scolasts secundars a Friburg ed a Turitg

Las ediziuns da La Quotidiana dals 7/8 d'avrigl cuntregnan contribuziuns davart il studi da rumantsch a Friburg ed a Turitg. In tema che vegn tutgà en questas contribuziuns è la cumpart da studentas e students che absolvan la furmaziun per scolasts secundars. Entant che quest contingent manca l'ultim temp a Friburg – pli baud sa tractavi da 5–8 personas –, datti uss a Turitg ina gruppada dad 8 personas. En La Quotidiana dals 8 d'avrigl (p. 1) vegn tratga la conclusiun che Turitg haja «gudagnà gist questa grupp che frequenta uss la nova Scol'auta da pedagogia a Turitg». Che questa conclusiun è memia simpla mussa la provegnienscha dals students da la scol'auta: L'emprima grupp che ha cumenzà a studegiar rumantsch l'onn 2005 sa cumponiva da 5 Ladins, 2 Sursilvans ed 1 Surmiran. La proxima «generaziun», ch'è ussa vidlonder da studegiar, sa cumpona da 6 Ladins e 2 Sursilvans. Igl è evident ch'ils Sursilvans, che furmavan la gronda part dals students a Friburg, n'èn betg represententads proporziunalmain a Turitg. En Surselva ston ins pia registrar ina diminuziun da l'interess per il studi da rumantsch in summa.

Da precisar è plinavant che l'emprima grupp da futurs scolasts secundars che ha profità da la purschida da rumantsch a Turitg n'aveva en mintga cas betg elegì ses lieu da studi pervi dal rumantsch. Cura che quellas personas han cumenzà lur studi, na devi numnadamain anc nagin curriculum da rumantsch per els. Il directur da la partiziun «stgalim secundar I» da la scol'auta ha pir suenter rendì attent ils responsabels da la retoromanistica da l'università ch'i dettia ina grupp da students rumantschs, als quals ins pudess porscher ina furmaziun en lur lingua.

Che la Scol'auta da pedagogia a Turitg attira students dal Grischun rumantsch na pon ins betg snegar. Ins stodontant vesair ch'ils students n'elegian betg lur lieu da studi pervi da la purschida da rumantsch. Cun crear ina tala purschida a Turitg han ins pudì gudagnar personas che avessan uschiglio absolvì in studi da scolast secundar senza rumantsch.

Danunder che La Quotidiana sa che la professura da Turitg è en privel, n'è betg cler a nus.

*Matthias Grünert e Clà Riatsch,
Universitad da Turitg*